

Parada cultural folklórico a resulta den un beyesa un biaha mas



ORANJESAD(AAN)-- Diadomingo ultimo pa di 3 año consecutivo Dia di Brazil a wordo celebra cu un parada Cultural Folklorico y cu e año aki a resulta den un beyesa un biaha mas. Por a nota claramente e crecimiento di e parada aki cu a cuminsa dos año pasa cu 5 grupo, crece pa 9 grupo año pasa y cu e año aki tabata tin participacion di 15 grupo.

For di momento cu Juby Naar a saca e gruponan 4 or atardi manera tabata stipula por a nota e interes di publico for di Centro di Bario Brazil caba, prome cu a drenta Caya Bernadina Growell, bira bay direccion Mabon, y di eynan bira drenta den noord Cura Cabay, y bin ariba yega na misa pa despues tuma e ultimo recta pa Caya Bernadina Growell pa bira drenta na Centro di Bario exactamente 7 or anochi.

No por keda sin menciona e esfuerso grandi haci pa tur

e gruponan. E carosa dilanti di Mosa Cultural Ludwina Geerman tabata hopi bunita y cu tur locual por a spera di parti di nos folklore y custumbenan y hasta proverbionan. Un creacion bunita di Sr. Mariano Bermudez cu ta un di e pilarnan tras di e creacionnan pa e parada y eleccion di Mosa Cultural un siman anterior. Grupo di Antaño di Belo Martijn un biaha mas a sobresali y cu un bunita carosa tambe cu un matrimonio di antaño. Di aprecia masha hopi ta e participacion di clientenan di Funari hunto cu e fundacion y nan voluntarionan. Masha bunita tabata pa mira e clientenan den nan trahenan di antaño coriendo den rolstoel, sea manual of di motoriza bailando y gozando di nan parada hunto cu nan ayudantenan voluntario.

E varios gruponan di scol di Brazil, tambe Flor di Brazil y entre otro Chazz models tambe tabata tin parti grandi

den exito aki. Di e ultimo tabata bunita pa mira con e hoben y hobencitanan a balia henter e ruta non stop y manera a wordo comenta, "nan a balia cu mas animo y placer cu durante carnaval mes.". Pocorn Dancers tambe tabata tin parti masha anima den nan bailenen, y cu grupo di Comision Bernadina cu Mervin Ras cerando e parada bon anima y cu hopi gozo..

Brisa Tropical y tambe Poco Loco tabata tin e ambiente bon anima dilanti y patras di e parada cu e gruponan cu nan a acompaña, mientras cu varios DJ cu nan miniteca a deleita e publico musicalmente y tabata acompaña gruponan mientras cu varios grupo a bin cu nan propio sistema di sonido. cu nan musica tipico.

Ya caba mayoria di e gruponan a confirma nan participacion pa Parada Cultura IV na 2014 y e expectativa a cu e siguiente lo tin un biaha mas un aumento di grupo participando.